

Pet godina proteklo je od odlaska zadnjeg stroja iz kanjona rijeke Gvožđanke, a njezini branitelji tek sada, nakon dobivenog Rješenja kantonalnog Ministarstva, mogu odahnuti. Zbog isteka ugovora o koncesijama za mini-hidroelektrane Luke, Bakovići, Željeznica, Željeznica 3 i Žica te nepostojanjem zahtjeva za produženjem istih, navedeni ugovori prestali su važiti, odnosno gradnje navedenih MHE na rijeci Željeznici neće biti.

Ovo je potvrđeno Eko udruzi "Gotuša" iz Fojnice u Ministarstvu poljoprivrede vodoprivrede i šumarstva kantona Središnja Bosna.

-Rokovi za gradnju i puštanje u komercijalni rad Ugovora o koncesijama za MHE Luke, Bakovići, Željeznica 1, Željeznica 3 i Žica su istekli, te nije bilo zahtjeva za produženje istih, niti su isti produženi, tako da su predmetni ugovori prestali važiti. Koncesionari koji su sa Koncesionarom zaključili prednje navedene ugovore izgubili su pravo na dodijeljene koncesije-, naveli su u Rješenju o slobodi pristupa informacijama iz nadležnog Ministarstva. Ovim je uspješno završena dugogodišnja borba lokalnog stanovništva za zaštitu rijeke Željeznice.

-Sadržaj ovog rješenja jasno govori da su koncesije za navedene MHE ništavne, a svaki novi eventualni koncesionar morao bi krenuti postupak od samoga početka i ponovo se suočiti s voljom naroda-, ističu u Eko udruzi "Gotuša" koja je i nastala iz zajedničke želje lokalnog stanovništva da spriječe gradnju MHE.

-Ovo bi trebala biti pouka i poruka svima da napokon shvate kako nam je zajednički interes prije svega očuvanje životne sredine, nasuprot želja pohlepnih pojedinaca da gradnjom MHE kapitaliziraju prirodna bogatstva samo za vlastito bogaćenje, bez obzira na posljedice za lokalno stanovništvo. Jamstvo toga bilo bi potpuno brisanje gradnje MHE iz Prostornog plana općine, što i jeste naš krajnji cilj-, naglašavaju u "Gotuši".

Borba lokalnog stanovništva protiv gradnje mini-hidroelektrana započela je 2009. godine kada je kompanija „JESS“ iz Busovače pokušala započeti radove na rijeci Željeznici u mjestu Gotuša, ali brзом reakcijom mještana radovi su zaustavljeni u začetku.

Nakon tri godine, investitor, firma "Peeb Company", ponovo je pokušala započeti radove, ali je sloga mještana opet odigrala presudnu ulogu. Tokom 325 dana i noći branitelji rijeke su protestovali sprečavajući početak izgradnje MHE.

-Trpjeli smo razne nepravilike; od vremenskih nepogoda do ugrožavanja temeljnih ljudskih prava. Silni su bili pritisci, prijetnje, zastrašivanja, pozivanja na sud i kazne. No, branitelji rijeke stoički su izdržali sve i s radošću ispratili zadnji radni stroj na kojem se godinu dana hvatala hrđa, sa željom da se nikada više ne pojavi u koritima naših prekrasnih rijeka!-, ističu u Eko udruzi "Gotuša".

Izvor: tacno.net